



Preziadas Rumantschas, preziai Rumantschs

Cun quest pareri lessel jeu dar ina cuorta egliada anavos sil 2018, denton era far ina prevista sin quei che spetga tut sin nus il 2019.

Retrospectiva 2018

Radunonza generala

A caschun dalla radunonza generala dils 18 da mars a Sargans havein nus astgau, ni meglier detg, stuiu relaschar quasi l'entira suprastonza da noss'uniun ella pensiun bein meritada. Oravontut a nies zun premurau e capavel president d'honor Venanzi Casanova po denton in detg buordi esser daus giu da dies quella sera, ha el numnadamein finalmein anflau, suenter ina liunga tscherca, in successur. Preziau Venanzi, nus savein buca engraziar avunda per Tia immensa lavur prestada ils davos 27 onns per nossa uniun!! In grond Dieuspaghi tucca naturalmein era als ulteriurs suprastonts pensiunai. Era il pli capavel president sa haver success mo cun il sustegn da ses consuprastonts.

Cheu aunc ina pintga remarca agl ur: la laudaziun dils honorai entras nies bien Lucas Caviezel ei stau in gaudi nundetg, da quels intermezzos lein nus el futur aunc veser ed udir dapli dal Lucas.

Nua ch'ei dat abdicaziuns drova ei naturalmein era successurs. Rinaldo Caduff sco president, Retus Speschas co cassier, Lea Killias sco actuara, Lucas Caviezel ed Andrea Dellner sco revisurs da quen, ein vegni elegi dalla radunonza cun resultats surprudents. En num dalla suprastonza nova lessel jeu engraziar zun fetg per la confindonza che vus haveis demussau cun eleger nus alla testa dall'uniun.

Era il num da nossa uniun ei, cun grond surpli, vegnius midaus alla radunonza generala da "Cerchel Romontsch Svizra Oriental" en Uniun Rumantscha Rezia Bassa.

Per calmar in smiul ils quitaus dil niev cassier per sia cassa ha la radunonza era decidiu d'augmentar la contribuziun annuala naven dil 2019 da 40.00 sin 60.00 francs. Quella contribuziun vala, senza excepziun, per tuts commembers, auter che per tals che han aunc buca cumplenu il 20avel anniversari.

Occurenzas

Cun las occurenzas planisadas il 2018 para la suprastonza nova da haver tuccau il gust dils commembers. Ton la viandada sil Flumserberg sco era la senda da chistognas a Murg, il cuors da cuschanar e la sera rumantscha cun lotto el School ein stai in detg success cun fetg biars participonts e resuns zun positivs. Aschia fa ei naturalmein grond plascher

dad organisar tals events. Engraziel fetg a tut quels che han priu part a nossas sentupadas, vus haveis motivau ils organisaturs da far vinavon aschia era el 2019!

A caschun dalla exposiziun d'uniuns el Pizolpark a Mels ha la suprastonza, cun ils revisurs ensemmen, priu igl atun vargau la caschun da presentar nossa uniun ad in vast publicum. Il resun ei denton, deplorablamein, buca staus veramein surprudents, aschia che nus havein decidiu da, silmeins per il mument, buca prender part pli a quella occurenza.

Chor maschadà Rumantsch Rezia Bassa

Egl onn passau ei il diember da cantaduras e cantadurs vegnius adina pli e pli gronds. Jeu sundel buamein staus mal per nies premurau dirigent Eugen. El vegneva practicamein buca pli suenter cun far adina da pli e dapli copias cun las canzuns e da semtg, practicamein sin mintga prova, novas mappas cotschnas, blauas e neras per ses cantadurs e sias cantaduras novas. Era da tener endamen adina puspei novs nums ha caschunau entgina rubaglia sin siu frunt, mo cheu eis el buca persuls, il president pitescha cun el. Da l'autra vart ei igl Eugen tuttavia empau loschs da nus e d'astgar direger in tal chor grond. Oz lessel jeu inagada trer la capiala per Tei ed engraziar zun fetg a Ti Eugen per tut quei che Ti prestas per nies chor.

Dar concert el Dorfbad a Ragaz Bogn, cantar en la casa da vegls a Maiavella, cantar per entgins giubilars sin natalezz ni era a caschun dalla radunonza generala, tut quei ha il chor dumignau cun bravura, engraziel fetg a vus tuts.

Prevista 2019

Mia partenza sco president niev dal'Uniun Rumantscha Rezia Bassa ei buca stada gest optimala la primavera vargada. Ina malsogna maligna ha frenau mei talmein, ch'ei era da quintar cul mender. Denton, zercl'em ceda nuota schi spert ed aschia sundel serevignius plausiu e sundel ussa plein motivaziun da muentar entatgei, quei ensemmen cun mes dus cunsuprastonts, per favur da nossa uniun. Denton, las pli impurtontas persunas essas vus, prezias commembras e preziai commembers. Senza vus, senza vies engaschi, senza vossa participiun allas sentupadas che la suprastonza organisescha, ei tut pil gat, gida tut nuot, va ina uniun alla malura. Ch'igl ei pil mument buca da haver tema per l'Uniun Rumantscha Rezia Bassa muossa buca mo la surprudenta partipaziun, cun mintgamei rodund 40 persunas ni dapli, a nossas sentupadas, mobein era il diember carschent da commembers.

El pareri digl onn 2014 ha il president Venanzi scret il suandont: "Nossa uniun ha ussa 77 commembers, il chor 27

cantaduras e cantadurs, tendenza - sminuent, il diember dils commembers va pia anavos! Tgi che ha la caschun da far reclama per noss' uniun dei po far diever da quella occasiun."

El pareri digl onn 2018 astgel jeu, sco president actual, scriver il suandont: "Nossa uniun ha ussa 99 commembers, il chor 44 cantaduras e cantadurs, tendeza - carschent, il diember dils commembers crescha pia puspei!"

Quella tendenza legrevla duei denton buca surmanar nus da schar dar l'aura pils larischs e smarschanar entuorn, anzi, ei ha num dar gas, ei drova era egl avegnir igl engaschi da mintga sulet, mo lu ei il success dalla Uniun Rumantscha Rezia Bassa segiraus era el futur.

Occurenzas

En las statutas stat scret: L'uniun Rumantscha Rezia Bassa ha la finamira da mantener e cultivar il lungatg e la cultura romontscha, specialmein il cant romontsch tradiziunal.

Da miu manegiar contonschan ins quella finamira il meglier cun dar la pusseivladad als Romontschs, specialmein en la diaspora, da semplamein saver sentupar e saver discuorer romontsch ensemmen. Gest il davos onn ha mussau, che nos commembers apprezzieschan quei e muossan era ei cun lur numerusa preschientscha a caschun dallas sentupadas. Perquei less la suprastonza era uonn puspei organisar occasiuns senza gronds brimboris e referats, anzi, il dialog, la pusseivladad e la peda da saver discuorer romontsch duei star el centrum.

Da l'autra vart mauncan era ils mieds finansials per organisar inscuters cun artists ni auters exponentes romontschs, sco ei vegn fatg per exempel a Turitg.

Ina damonda alla Lia Rumantscha per sustegn finansial da nossa uniun ei deplorablamein vegnida refusada. Ei vegn d'ina vart comunicau che la diaspora seigi fetg impurtonta, rodund in tierz dils Romontschs vivan leu, cura ch'ei va denton per il sustegn ein quels da Cuera ualti ruasseivels e prendan massa peda per ina risposta. Igl ei naturalmein era pusseivel che nossa uniun ei buca gest aschi interessanta per els e vala perquei buca la peina da sustener, tgei san ins.

En mintga cass, la suprastonza ha puspei sespruvau da metter ensemmen in programm variont per il 2019. Cun organisar ina sentupada d'unviern sil Pizol mein nus vias novas, sundel spanegiaus sin la participaziun. Igl emprem cuors da cuschanar ei staus onn in grond success, aschia che nus organisein era uonn in tal. La sera rumantscha cun lotto sauda naturalmein vinavon sin la gliesta, gest sco il concert da nies chor el Dorfbad a Ragaz Bogn. Tgei sentupadas che ein vinavon planisadas anfleis vus sin la gliesta d'occurenzas che vus haveis survegniu ensemmen cun l'invitaziun alla radunonza generala.

Vus tuts essas cordialmein envidai en da far part a quels eveniments e naturalmein era da far atgnas propostas per tals. Ulteriuras informaziuns dat la suprastonza bugen per e-mail ni telefon.

Per il chor vegn il 2019 ad esser in tec speziels. Sco ei vesa ora ei quei il davos onn sut la bitgetta da nies dirigent

d'honor Eugen Casanova. Suenter liungs 33 onns vul el dar il chor en mauns pli giuvens e silsuenter rinforzar ils bassists cun sia vusch ferma e biala.

La perspectiva d'anflar capavlas ni capavels successurs ch'ei prompts da sorprender la ierta digl Eugen ein, sco ei vesa ora per il mument, fetg buna. Cura, cun tgi ed en tgei moda e maniera che la surdada succeda ei aunc buca definau. Igl aspect finansial gioga era ina rolla buca meins decisiva, ei gie nossa cassa buca aschi bein dotata che nus pudein e savein selubir tut e mintgin. Cheutras essan nus stai, cul Eugen e sias pretensiuns fetg mudestas, els davos onns en ina situaziun propi confortabla.

Engraziel

sco finiziun detgel jeu semplamein

Engraziel Venanzi per Tiu agid e per Tes buns cussegls e per tut quei che Ti has prestau. Fai ussa empau pli pacific e gauda semplamein ils proxims onns, Ti has veramein meritau ei.

Engraziel Lea e Retus per vies engaschi, per vossa pazienza e capientscha cura che vus vegnis bumbardei da mei cun e-mails, gliestas da tractandas liungas sco romans da Toni Halter e sesidas che vulevan buca pigliar fin. A mi fa ei en mintga cass plascher da luvrar ensemmen cun vus dus.

Engraziel Lucas ed Andrea per vossa lavur sco revisurs da quen e per vies agid.

Engraziel allas gidontras e gidonters davos las culissas per organisar la sera da lotto, per far grondius desserts e prima pettas, per cuschanar ina suppa da giutta schi buontad sco jeu vaiel aunc mai astgau guder, per il sponsoradi dil vin ni per barsar steaks zarts sco pischada a caschun dalla sera da grill dil chor, per ils bials premis pil lotto, per scriver mintg'onni viers 100 !! cartas da natalezzis, per organisar il cant per ils giubilars, per sorprender spontan la direzziun dil chor muort assenza da dirigent e vicedirigent, per scriver interessants rapports ellas gasettas, per visitar nos giubilars pli passai a caschun da lur natalezzis rodunds, per gidar nies dirigent cun notas e runar entuorn per el las valischas pasancas, ed aschia vinavon, ei dess aunc bia da menziunar.

A Ti Eugen in grond Dieuspaghi per tia pazienza cun nus duront las provas da cant e per tia gronda lavur en favur dil chor, e quei gia dapi 32 onns – jeu tilel la capiala!

Engraziel era Amadeus, che Ti eis prompts da substituir il dirigent cura ch'el ei absents, era sche Ti fas quei, en mitga cass ord vesta d'in Lumnezian, cun Tia sgarscheivla pronunzia da Broil (Breil).

A tuttas commembras e tuts commembers lessel, sco finiziun da miu pareri, dir engraziel per vossa confidonza e per las biallas uras che nus havein astgau guder ensemmen. Jeu sperel e vaiel plascher da veser vus era uonn puspei ad ina ni l'autra sentupada.

Mols, fevrer 2019, vies president

Rinaldo Caduff